

論西報述日本近事

日昨各處西字新報陳說中國近與日本各信或有傳言之各歧或有揣度之非實即昔人所謂所見異辭所聞異辭所傳聞又異辭者是也其報有曰中國現在調齊各處將士令赴臺灣以備開兵接仗之用誠哉是言也夫日本與兵侵犯臺灣今數月矣其初所託辭者臺灣生番牡丹社慘殺琉球遭風難民伊為報仇懲戒等語中國置不與校以為言雖無理事尚有因故令聽其所為業已報仇懲戒矣亦可無所藉口潛行退兵也乃竟占地築室以為久駐之計是又何說歟然謂忍之又忍忍之又忍不意日本之君臣猶復冥頑不靈枯惡不悛安得不動天人之怒而召征討之師哉今者東南之兵業已徵調或徑赴臺灣或分駐澎湖或屯紮閩省即天津之勁旅均習而法用西器者亦皆陸續南下前隊之至袁浦者已有萬餘現候輪船齊至鎮江即令載運出洋同往臺灣也觀乎此日本不退其將兵戎以從事也必矣但至是而始用兵亦昔人所謂既理喻勢禁之俱窮復袖手旁觀之不可是也天下萬國豈猶有聽中國之非者哉又傳言日本遣使至北京見其駐華之柳原欽使轉告中國請撤兵回國不須賠給兵費惟欲中國與之盟約永保此後東民不復遭生番之慘待云云果有是事則日本之君亦尚可謂能改過矣或曰日本之君非能改過者也特聞中國調集將士將與之戰恐力不能支是以撤兵耳吁為是說者未免有阻人遷善改過之心耳古人有言人非聖賢孰能無過過而能改善莫大焉古之人亦有桀紂幽厲新莽隋煬已至國亡身弑而向不知悔者今日日本之君尚未及此而已知悔亦可謂能勇於改過者矣或又曰日本之甘心退兵者蓋因美國執其主謀之李珍大無人主謀是以感寒而退耳此說亦未免近於苛刻日本之侵犯臺灣其謀雖由於李珍大然一切將止皆日本本國之人也何至失一人而遂阻眾人之志哉雖然其說亦不無因也蓋日本之君臣見美國執其轄下之人珍大不使與之同事可見列國皆遵萬國公法而已獨犯之恐為眾怒之所歸矣日後列國皆效美國之所為僱他國之船而不從買他國之器而不允一旦兵敗國危將求助於眾國必無有憐惜而救援之者豈不身為獨夫哉是以悟而懼懼而改矣果能如是改過之舉雖由日君而使有改過之行實由美國也是美國不徒能成己之美而且能成人之美矣第恐傳說不實則兩國赤子仍不免於兵戎非獨日本之不幸抑亦中國之不幸也是殆上天尚無悔禍之心歟